

**Publication:** Isolezwe

**Title:** Inselelo ngemijondolo eseThekwini

**Publish date:** 13 February 2019

**Reach:** 78220

**AVE:** R 25503.6

**Author:** PHILI MJOLI

# Inselelo ngemijondolo eseThekwini

**PHILI MJOLI**

**K**UZOTHATHA iminyaka elinganiselwa kwengu-60 ukugqeda imijondolo eyakhele eTheku.

Lokhu kuvuze yinhloko ebambile eMnyangweni wezokuHlaliswa kwaBantu eThekwini, uMnuz Vis Moodley, othe uma kusetsenziswa izindlela ezikhona manje zokugqeda imijondolo eThekwini kungathatha iminyaka elinganiselwa ku-60 ukuyiqeda.

UMoodley ubekhuluma esigcawini sezinsuku ezimbili sokubonisana ngezindlela zokuthuthukisa izindawo okwakhiwe kuzo imijondolo eThekwini, i-Informal Settlement Upgrade Summit, eqale izolo okulindeleke ukuthi iphuthulwe namhlanje eMgababa.

UMoodley uthe abahlala emijondolo babona sengathi uhlelo lokwakhiwa kwezindlu luhamba kancane. Uqhube wathi olindela ababakhelwe ukuthi abantu bahlale kubo okungenani iminyaka emihlanu sebedinga ukulungiswa. Imali yokubalungisa ayikho.

Uqhube wathi kunabantu abaqala ukuhlala kolindela ngo-2008 kuze kube yimanje abakazitholi izindlu zomxhaso. Uthe asebelale kolindela isikhathi eside baba nemibhikisho bekhala ngokuhlala kwabo isikhathi eside



**UNGGONGQOSHE wezokuHlaliswa kwaBantu KwaZulu-Natal uMnuz uRavi Pillay ekhuluma izolo esigcawini ebesiseMgababa sokubonisa ngokuthuthukiswa kwezindawo okwakhiwe kuzo imijondolo**

Iisithombe: SIBUSISO NDLOVU AFRICAN NEWS AGENCY (ANA)

kulezi zindawo.

“Njalo ngonyaka kwakhiwa izindlu zomxhaso ezintsha, umbuzo okhona ngowokuthi ngabe bayancipha abahlala kolindela?”

Cha abanciphi. Uthi ungakadilizwa ulindela kube sekukhona abangena kuwo ngenkani. Nasemijondolo kuyefana kucinene, kwakhiwa imijondolo emisha usuku nosuku,

abanye baze bangene emhlabeni okungakhiwe kuwo ngodli bakhe imijondolo,” kusho yena.

UNkk Zandile Gumede, iMeya yeTheku, uthe ngaphezu

kwemizamo yabo yokwakhela abahlala emijondolo izindlu umehluko awubonakali ngoba abantu bafudukela kuleli dolobha bezofuna imisebenzi. Imijondolo iyanda kunokuthi inciphe. Abahlala kuyo uthe basengcupheni yezinhlekelele zomlilo, ukuguguleka uma lina kakhulu nokunye.

UNggongqoshe walo Mnyango, uMnuz Ravi Pillay, uthe uyakuqonda ukuthi uMasipala weTheku awukwazi ukwakhela bonke abahlala emijondolo izindlu.

Uqhube wathi: “Siyazi ukuthi kukhona abazuzayo ngokuba khona kwemijondolo. Kukhona omasitende, abadayisa iziza nabanebhizinisi lokuxhumela abanye ugesi ongekho emthethweni. Ngakolunye uhlangothi nathi asikwazi ukugqasha abantu abanele abazobhekana nabenza lo mkhuba. Senza kanjani ukuthi kulesi simo kuphume into ezokwenza ukuthi sonke sithuthuke kungabikhona owebayo? Nginethemba lokuthi kulesi sigcawu sizophuma nezimpendulo,” usho kanje.

UMnuz Sbu Zikode, umengameli wenhlangano Abahlali baseMijondolo, uthe okubekwe ezithembeni kulesi sigcawu kuyethembisa kodwa unovalo lokuthi amakhansela awasiyo ingxenywe yaso okungenzeka angazishayi mkhuba izinqumo ezithathwe kuso.